



CONCELLO DE MUROS

Curro da Praza, 1  
15250 A Coruña  
T. +34 981 826 050

## **ACTA DA SESIÓN ORDINARIA DO PLENO NÚM. 4 DA CORPORACIÓN CELEBRADA O 30 DE MARZO DE 2023**

### **PERSOAS ASISTENTES**

#### **PRESIDENTA:**

Da. María Inés Monteagudo Romero (PP)

#### **CONCELLEIROS/AS:**

Da. María del Carmen González García (PP)

D. Juan Manuel Martínez Martínez (PP)

D. José Vázquez Rama (PP)

Da. Caridad González Cerviño (PSOE)

Da. María del Rosario Fernández Piñeiro (PSOE)

Da. Sandra Maneiro Pais (PSOE)

D. Ramón Lago Tajés (PSOE)

Da. María Xosé Alfonso Torres (Non adscrita)

D. José Manuel Quintela Fernández (Non adscrito)

Da. María Sambade Lloréns (Non adscrita)

Da. María Lago Lestón (BNG)

Da. Maruxa Martínez Romaní (BNG)

#### **SECRETARÍA XERAL**

Da. Mónica Freire Dosil

No salón de sesións da Casa Consistorial sendo as vinte horas e trinta minutos, do día de referencia, reúnen-se en primeira convocatoria os/as concelleiros/as citados/as anteriormente, co obxecto de celebrar a sesión ordinaria do Pleno da corporación, asistidos por min, a secretaria do Concello que certifico.

Comprobada a existencia do quórum necesario, a señora alcaldesa declara aberta a sesión, con arranxo á seguinte orde do día:

#### **ORDE DO DÍA**

##### **A. Parte dispositiva**



**Primeiro. Aprobación das actas anteriores núm. 2 do pleno extraordinario do 10 de febreiro de 2023 e núm. 3 do pleno ordinario do 23 de febreiro de 2023**

A señora alcaldesa, Da. María Inés Monteagudo Romero, pregunta aos membros da corporación se teñen algunha observación que dicir ao respecto da acta núm. 2 do pleno extraordinario do 10 de febreiro de 2023 que se presenta para que o Pleno a aprobe, e non habendo observacións, apróbase a acta anterior núm. 2 do pleno extraordinario do 10 de febreiro de 2023 cos votos a favor do grupo municipal socialista (4), do grupo municipal popular (4), do grupo municipal do BNG (2) e da concelleira non adscrita, Da. Sambade Lloréns (1), e coa abstención dos concelleiros non adscritos, Da. Alfonso Torres e D. Quintela Fernández (2).

Da. María Inés Monteagudo Romero pregunta aos membros da corporación se teñen algunha observación que dicir ao respecto da acta núm. 3 do pleno ordinario do 23 de febreiro de 2023 que se presenta para que o Pleno a aprobe, e non habendo observacións, apróbase por unanimidade a acta anterior núm. 3 do pleno ordinario do 23 de febreiro de 2023 cos votos a favor do grupo municipal socialista (4), do grupo municipal popular (4), do grupo municipal do BNG (2) e dos concelleiros non adscritos (3).

**Segundo. Aprobación do Convenio de Colaboración entre o Concello de Muros e a Asociación Rural de Desenvolvemento da Ría de Muros-Noia para executar o PSTD “Novos Modelos para a sostibilidade e competitividade Turística na Ría Muros- Noia”, no marco do plan de Recuperación, Transformación e Resiliencia financiado pola Unión Europea Next Generation EU**

Intervén a alcaldesa que explica a proposta que vén ditaminada favorablemente pola comisión informativa:

*“Visto o Convenio de Colaboración da ARD Ría Muros-Noia cos seus concellos integrantes (Lousame, Muros, Noia, Outes e Porto do Son) para executar o PSTD “Novos modelos para a sustentabilidade e competitividade turística na Ría Muros-Noia” no marco do Plan de Recuperación, Transformación e Resiliencia financiado pola Unión Europea Next Generation EU, esta Alcaldía eleva ao Pleno da corporación e ao estudo previo por parte da comisión informativa a adopción do seguinte acordo:*

*Consta no expediente informe proposta da Secretaría xeral que contén o procedemento e o órgano competente para subscribir o convenio, a lexislación aplicable e a proposta a adoptar.*

**ACORDO:**

*PRIMEIRO. A aprobación do Convenio de Colaboración entre o Concello de Muros e a Asociación Rural de Desenvolvemento da Ría de Muros-Noia para executar o PSTD “Novos Modelos para a sostibilidade e competitividade Turística na Ría Muros- Noia”, no marco do plan de Recuperación, Transformación e Resiliencia financiado pola Unión Europea Next Generation EU.*

*SEGUNDO. Facultar á señora alcaldesa do Concello de Muros para a formalización e sinatura do referido convenio e para todas aquelas actuacións que sexan necesarias para a mellor execución do acordado.*

**CONVENIO DE COLABORACIÓN DA ARD RÍA MUROS-NOIA COS SEUS CONCELLOS INTEGRANTES (LOUSAME, MUROS, NOIA, OUTES E PORTO DO SON) PARA EXECUTAR O PSTD “NOVOS MODELOS PARA A SUSTENTABILIDADE E COMPETITIVIDADE TURÍSTICA NA RÍA MUROS-NOIA” NO MARCO DO PLAN DE RECUPERACIÓN, TRANSFORMACIÓN E RESILIENCIA FINANCIADO POLA UNIÓN EUROPEA NEXT GENERATION EU**

*En Lousame, o ... de ... de .....*

**COMPARECEN**

**INTERVEÑEN**



## CONCELLO DE MUROS

Curro da Praza, 1  
15250 A Coruña  
T. +34 981 826 050

Os alcaldes comparecentes interveñen en nome de cadanseu concello, aos que representan ao abeiro dos artigos 21.1.b) da Lei 7/1985, do 2 de abril, reguladora de bases de réxime local, e 61.1.a) da Lei 5/1997, da administración local de Galicia. Están autorizados para este acto por acordo adoptado polos plenos das corporacións respectivas de datas ....

Ademais, Da. M<sup>a</sup> Teresa Villaverde Pais, intervén en nome da ARD Ría Muros-Noia, titular do CIF nº G 15797657, á que representa de conformidade co artigo 11.2.a) dos seus estatutos na súa condición de presidenta da entidade. Está autorizada para este acto en virtude de acordo adoptado na asemblea xeral da asociación na sesión que tivo lugar o día ....

### EXPOÑEN

**PRIMEIRO.** Por medio de convenio asinado entre a Axencia Turismo de Galicia e a ARD Ría Muros-Noia con data 28/11/2022 as partes asinantes articularon a colaboración para executar o subproxecto denominado "Plan de sustentabilidade turística en destino (en diante, PSTD) da ARD Ría Muros-Noia" con cargo aos fondos europeos procedentes do Mecanismo de Recuperación e Resiliencia e recoñécese á ARD Ría Muros-Noia como entidade xestora do devandito subproxecto.

**SEGUNDO.** A relación das actuacións previstas no antedito subproxecto son as recollidas na cláusula terceira do convenio e o seu custo ascende a dous millóns de euros (2.000.000 €) de conformidade coa distribución temporal que foi modificada por acordo da Asemblea da ARD Ría de Muros Noia do 21 de decembro de 2022 do xeito que se detalla:

Eixos programáticos	Actuacións	Anualida de 2022	Anualida de 2023	Anualida de 2024	Total
<b>Eixo 1. Transición verde e sustentable</b>	1 Senda Litoral tramo a (Coira)		148.000		148.000
	2 Senda Litoral tramo b (Obre)			110.000	110.000
	3 Senda Litoral tramo c (Sieira)		104.000		104.000
	4 Ordenación do uso turístico do LIC Monte Louro Rede Natura 2000		140.000	103.000	243.000
	<b>Total EIXO 1</b>		<b>0</b>	<b>392.000</b>	<b>213.000</b>
<b>Eixo 2. Mellora da eficiencia enerxética</b>	5 Itinerario Cultural a Santiago da Ría de Muros Noia		280.000	80.000	360.000
	6 Mobilidade urbana peonil na Serra de Outes		211.000		211.000
	<b>Total EIXO 2</b>		<b>0</b>	<b>491.000</b>	<b>80.000</b>
<b>Eixo 3. Transición dixital</b>	7 Canal IP e dixitalización da información en destino		75.000	15.000	90.000
	8 Desenvolvemento de contidos dixitais		40.000	40.000	80.000
	9 Musealización dixital na Mina de San Finx			78.000	78.000

**CONCELLO DE MUROS**

Curro da Praza, 1  
15250 A Coruña  
T. +34 981 826 050

		<b>Total EIXO 3</b>	<b>0</b>	<b>115.000</b>	<b>133.000</b>	<b>248.000</b>
<b>Eixo 4. Competitividada de</b>	<b>1 0</b>	<i>Mina de San Finx. Adecuación de edificio histórico</i>		90.000		90.000
	<b>1 1</b>	<i>Área de servizo a autocaravanas e bicicletas</i>			77.000	77.000
	<b>1 2</b>	<i>Adecuación do entorno industrial da Chainza</i>		46.000		46.000
	<b>1 3</b>	<i>Rede de Miradoiros Ría da Estrela</i>		93.000		93.000
	<b>1 4</b>	<i>Desenvolvemento participativo de produtos de turismo activo</i>		20.000	50.000	70.000
	<b>1 5</b>	<i>Gobernanza disruptiva e participativa</i>		134.000	66.000	200.000
			<b>Total EIXO 4</b>	<b>0</b>	<b>383.000</b>	<b>193.000</b>
<b>TOTAL</b>			<b>0</b>	<b>1.381.000</b>	<b>619.000</b>	<b>2.000.000</b>

A totalidade do gasto citado finánciase con cargo aos fondos europeos e por conta das correspondentes aplicacións 05.A2.761A.781.0 e 05.A2.761A.821.06 dos orzamentos da Xunta de Galicia para a anualidade de 2022. A Axencia Turismo de Galicia anticipoulle á ARD Muros-Noia o importe correspondente ao financiamento daquel convenio.

Os gastos que se consideran financiábeis ao abeiro do convenio citado son os que respondan de xeito indubidado á natureza das actividades, sexan necesarios para acadar o obxectivo 217 e se realicen dentro do prazo alí establecido e, en concreto, os enumerados na cláusula terceira do convenio do que falamos.

**TERCEIRO.** A ARD Ría Muros-Noia e os concellos integrantes dela consideran que para garantir a xestión e correcta execución das actuacións previstas no plan e subproxecto subvencionado no marco do PRTR é preciso que o Concello de Noia actúe como única entidade executora baixo a responsabilidade e dirección da ARD Ría Muros-Noia, de acordo co previsto no apartado quinto.8 da Resolución 1/2022, do 12 de abril, da Secretaría Xeral de Fondos Europeos do Ministerio de Facenda e Función Pública, que prevé que, no caso de que se lle asigne un subproxecto a unha agrupación de entidades locais que non adquira algunha das formas xurídicas previstas no artigo 3 da Lei 7/1985, do 2 de abril, reguladora das bases de réxime local, designarase unha única entidade local como executora do subproxecto, á que lle corresponderá formular o informe de xestión-certificado correspondente mediante certificación da súa Secretaría.

Polo exposto, as persoas comparecentes, na calidade na que cada unha deles intervén, aproban este convenio de colaboración con suxeición ás seguintes

**CLÁUSULAS****Primeira. Obxecto do convenio**



Este convenio ten por obxecto articular a colaboración entre as entidades asinantes, por unha banda, a ARD Ría Muros-Noia, e pola outra, os seus concellos integrantes de Lousame, Muros, Noia, Outes e Porto do Son, co obxectivo de executar o Plan de Sustentabilidade Turística en Destino con cargo aos fondos europeos procedentes do Mecanismo de Recuperación e Resiliencia. O convenio formalízase ao abeiro dos artigos 47 e seguintes da Lei 40/2015, do 1º de outubro, de réxime xurídico do sector público, en coherencia co previsto na cláusula segunda do convenio Axencia Turismo de Galicia-ARD Ría Muros-Noia.

### Segunda. Entidades xestora e colaboradoras do PSTD

A ARD Ría Muros-Noia ten a condición de entidade xestora do antedito Plan e, en concreto, do subproxecto denominado "Novos modelos para a competitividade turística na ría Muros-Noia", de conformidade co convenio que asinou coa Axencia Turismo de Galicia con data de 28 de novembro de 2022, que se xunta e que se entende como formando parte integrante deste documento.

Os concellos integrantes da ARD terán a condición de entidades colaboradoras da execución dos devanditos Plan e Subproxecto ao abeiro deste convenio e das instrucións aprobadas pola Resolución 1/2022, do 12 de abril, da Secretaría General de Fondos Europeos do Ministerio de Hacienda y Función Pública.

### Terceira. Designación do Concello de Noia como entidade executora do PSTD

A ARD Ría Muros-Noia, como xestora do PSTD, e os concellos integrantes dela Muros, Noia, Outes, Lousame e Porto do Son na calidade de entidades colaboradoras, designan como única entidade colaboradora executora do Subproxecto ao Concello de Noia, de acordo co previsto no apartado quinto.8 da Resolución 1/2022, do 12 de abril, da Secretaría General de Fondos Europeos do Ministerio de Hacienda y Función Pública, que prevé que, no caso de que se lle asigne un subproxecto a unha agrupación de entidades locais que non adquira algunha das formas xurídicas previstas no artigo 3 da Lei 7/1985, do 2 de abril, reguladora das bases de réxime local, designarase unha única entidade local como executora do subproxecto, á que lle corresponderá formular o informe de xestión-certificado correspondente mediante certificación da súa Secretaría.

O Concello de Noia na condición antedita levará a cabo a licitación e execución das seguintes actuacións incluídas no PSTD:

Eixos programáticos		Actuacións	Total
<b>Eixo 1. Transición verde e sustentable</b>	1	Senda Litoral tramo a (Coira)	148.000
	2	Senda Litoral tramo b (Obre)	110.000
	3	Senda Litoral tramo c (Sieira)	104.000
	4	Ordenación do uso turístico do LIC Monte Louro Rede Natura 2000	243.000
		<b>Total Eixo 1</b>	<b>605.000</b>
<b>Eixo 2. Mellora da eficiencia enerxética</b>	5	Itinerario Cultural a Santiago da Ría de Muros Noia	360.000
	6	Mobilidade urbana peonil na Serra de Outes	211.000
		<b>Total Eixo 2</b>	<b>571.000</b>
<b>Eixo 3. Transición dixital</b>	7	Canal IP e dixitalización da información en destino	90.000
	8	Desenvolvemento de contidos dixitais	80.000
	9	Musealización dixital na Mina de San Finx	78.000
		<b>Total Eixo 3</b>	<b>248.000</b>
<b>Eixo 4. Competitividade</b>	10	Mina de San Finx. Adecuación de edificio histórico	90.000
	11	Área de servizo a autocaravanas e bicicletas	77.000



## CONCELLO DE MUROS

Curro da Praza, 1  
15250 A Coruña  
T. +34 981 826 050

	12	Adecuación do entorno industrial da Chaínza	46.000
	13	Rede de Miradoiros Ría da Estrela	93.000
	14	Desenvolvemento participativo de produtos de turismo activo	70.000
	15	Gobernanza disruptiva e participativa	200.000
		<b>Total Eixo 4</b>	<b>576.000</b>
<b>TOTAL</b>			<b>2.000.000</b>

A ARD Ría Muros-Noia poderá reasignar os fondos que financian o PSTD e incluír novas actuacións no Subproxecto no caso de que se constate a inviabilidade física ou xurídica dalgunha ou algunhas das inicialmente previstas ou no caso de que se produzan baixas nos procedementos de licitación. Dito remanente derivado das baixas poderá dar lugar á financiación de novos proxectos escollidos pola ARD Ría Muros-Noia, sempre ao abeiro do establecido nas normas e instrucións que rexen o PSTD e por medio de acordo da asemblea da ARD Ría Muros-Noia co voto favorable dos representantes dos concellos que a integran.

O Concello de Noia comprométese a executar as actuacións incluídas no Subproxecto con suxeición ás condicións do Plan de Sustentabilidade Turística en Destino e, en particular, das fichas de actuación correspondentes e das modificacións aprobadas regulamentariamente.

Os gastos de xestión (custes salariais pola especial dedicación de persoal municipal, contratos administrativos etc...) que lle xere ao Concello de Noia a execución do PSTD obxecto deste convenio financiaranse por conta do orzamento da actuación denominada "15. Gobernanza disruptiva e participativa" do Eixo 4. Competividade do Subproxecto.

### **Cuarta. Obrigacións das entidades beneficiarias**

A ARD Ría Muros-Noia, como entidade xestora, e os concellos que a integran, o de Noia como entidade colaboradora executora e os demais como entidades colaboradoras, e todas elas como beneficiarias, asumen as obrigacións enumeradas na cláusula quinta do convenio coa Axencia Turismo de Galicia:

1º. A afectación dos ingresos percibidos ao abeiro do Plan á execución das actuacións obxecto de financiamento coa correlativa obrigación de reintegro total ou parcial no caso de non se realizar o gasto ou de incumprimento total ou parcial dos obxectivos previstos.

2º. As actuacións financiadas son as enumeradas na cláusula 3ª do convenio, cos obxectivos, fitos e programación temporal alí establecida.

3º. Correspóndelles á ARD Ría Muros-Noia e ao Concello de Noia, na medida da designación realizada a favor deste último como entidade executora, levar a cabo as devanditas actuacións, aplicar os fondos previstos aos gastos correspondentes á execución e desenvolvemento das actuacións previstas, destinar os importes ás actuacións concretas nos prazos estipulados, aplicar os recursos humanos e materiais necesarios para cumprir os prazos de execución e maximizar os resultados perseguidos, xustificar a realización das actuacións e os gastos ante a Axencia Turismo de Galicia mediante a documentación que se recolle na cláusula décima do convenio, actuar baixo os principios de obxectividade, publicidade e transparencia e cumprir as obrigacións establecidas no artigo 11 da Lei 9/2007, do 13 de xuño, de subvencións de Galicia.

4º. A ARD Ría Muros-Noia, o Concello de Noia e os demais concellos beneficiarios do PSTD, na medida que a cada un deles lles corresponde, deberán actuar con suxeición ás disposicións comunitarias sobre o Mecanismo de Recuperación e resiliencia e aos seguintes principios:

1º) Con carácter xeral:



a) *Contribuír ao cumprimento do Obxectivo 217 da Decisión de Execución do Consello relativo á adjudicación do orzamento para os Plans de Sustentabilidade Turística en Destinos así como os fitos 220 relativo á finalización dos Plans de Sustentabilidade Turística en Destinos e 221 relativo á finalización dos proxectos de promoción da sustentabilidade turística en destinos.*

b) *Destinar os fondos percibidos ao obxecto concreto para o que se concederon e realizar as actuacións que integran o proxecto na forma, condicións e prazo establecidos no convenio, así como xustificar ante a Axencia de Turismo de Galicia o cumprimento da finalidade e o seu custo real.*

c) *A prevención, detección, comunicación, corrección e avaliación de risco de fraude, corrupción e conflito de interese e a realización da Declaración de Ausencia de Conflito de Intereses (DACI) e a dispoñibilidade dun procedemento para abordar estes conflitos de intereses no marco do Regulamento (UE) 2021/241 do Parlamento Europeo e do Consello, do 12 de febreiro de 2021, e de acordo coas obrigacións da Orde HFP/1030/2021, do 29 de setembro. A este respecto, as entidades beneficiarias deberán aplicar medidas antifraude eficaces e proporcionadas no seu ámbito de xestión, que serán incluídas no seu Plan Xeral de medidas antifraude na aplicación de fondos públicos. En especial, tomará as medidas para asegurar que non exista conflito de interese, incluíndo nos expedientes que se tramiten os informes ou declaracións responsables necesarias, segundo corresponda, e aplicando a normativa reguladora dos conflitos de interese en caso de detectalos.*

d) *Someterse ás actuacións de control e seguimento da aplicación dos fondos destinados ao proxecto mediante a verificación de documentos e á avaliación continua e final por parte da Axencia Turismo de Galicia, así como ao control financeiro deles pola Consellería de Facenda da comunidade autónoma e o Tribunal de Contas e órganos estatais e europeos que teñan encomendado o control e seguimento dos fondos do Mecanismo de Recuperación e Resiliencia, en particular a Comisión europea, o Tribunal de Contas Europeo, a Oficina Europea de Loita contra a Fraude (OLAF) e a Fiscalía europea, que poderán acceder á información de detalle das actuacións realizadas.*

e) *Comprométense a remitir a Axencia Turismo de Galicia canta información fose necesaria sobre xestión, execución e control de todas as actuacións que se realicen no marco do presente convenio.*

f) *As entidades beneficiarias, en canto entidade executora e colaboradoras da execución, levarán a cabo o indicado no artigo 8 da Orde HFP/1030/2021, en relación coa identificación do perceptor final dos fondos, entidades beneficiarias das axudas, contratistas e subcontratistas e á achega desta información. Especificamente, deberá preverse a aceptación por parte dos perceptores finais dos fondos da cesión de datos entre as administracións públicas implicadas para dar cumprimento ao previsto na normativa europea que é de aplicación e de conformidade coa Lei 3/2018, do 5 de decembro, de protección de datos persoais e garantía dos dereitos dixitais, conforme ao modelo establecido no anexo IV. B da Orde HFP/1030/2021, do 29 de setembro. Con esa finalidade, as entidades beneficiarias executante e colaboradoras incluírán nos procedementos de licitación as seguintes obrigacións en relación coa identificación dos contratistas e subcontratistas:*

- *NIF do contratista ou subcontratistas.*
- *Nome ou razón social.*
- *Domicilio fiscal do contratista e, no seu caso, subcontratistas.*
- *Aceptación da cesión de datos entre as Administracións Públicas implicadas para cumprir o previsto na normativa europea que é de aplicación e de conformidade coa Lei Orgánica 3/2018, do 5 de decembro, de protección de datos persoais e garantía dos dereitos dixitais (Modelo anexo IV. B).*
- *Declaración responsable relativa ao compromiso de cumprimento dos principios transversais establecidos no PRTR e que puidesen afectar o ámbito obxecto de xestión (Modelo anexo IV. C).*



## CONCELLO DE MUROS

Curro da Praza, 1  
15250 A Coruña  
T. +34 981 826 050

*Os contratistas acreditarán a inscrición no Censo de empresarios, profesionais e retedores da Axencia Estatal da Administración Tributaria ou no Censo equivalente da Administración autonómica, que debe reflectir a actividade efectivamente desenvolvida na data de participación no procedemento de licitación.*

*g) Mantemento dunha adecuada pista de auditoría das actuacións realizadas no marco deste convenio e a obrigaón de mantemento da documentación soporte. A subministración da información realizarase nos termos establecidos pola Orde HFP/1030/2021 e a Orde HFP/1031/2021, do 29 de setembro, do Ministerio de Facenda e Función Pública.*

*h) Custodiar e conservar toda a documentación orixinal, xustificativa da aplicación dos fondos recibidos, en tanto poidan ser obxecto das actividades de comprobación e control.*

*i) Deberán conservar os documentos xustificativos, os datos estatísticos e demais documentación concernentes ao financiamento, así como os rexistros e documentos, en formato electrónico e por un período de cinco anos desde que se abonase o saldo da operación financeira, ou por un período de tres anos, cando o importe da subvención sexa inferior a 60.000 euros, nos termos previstos no artigo 132 do Regulamento (UE, Euratom) 2018/1046 do Parlamento Europeo e do Consello, do 18 de xullo.*

*j) As entidades beneficiarias están obrigadas a crear en España todo o emprego necesario para a realización da actividade, que se realizará con persoal contratado e afiliado á Seguridade Social. O cumprimento deste requisito terá que xustificarse documentalmente.*

*k) As entidades beneficiarias deberán cumprir coa normativa nacional e europea relativa á compatibilidade co réxime de axudas de Estado e prevención do dobre financiamento, de acordo co previsto no artigo 7 da Orde HFP 1030/2021, do 29 de setembro, conforme ao previsto na cláusula 13 do presente convenio.*

*l) Devolver á Axencia Turismo de Galicia as cantidades anticipadas, que non se utilizaron na execución da actividade ou actividades, nos prazos e condicións previstos no presente convenio, de acordo ao procedemento establecido na Cláusula 10.*

*ll) Cumprir coas obrigaóns de publicidade, medidas de difusión e comunicación, conforme ao previsto no artigo 9 da Orde HFP/1030/2021, do 29 de setembro, así como coa cláusula 11 do presente convenio.*

*m) As entidades beneficiarias comprométese a incluír os datos e información que sexan pertinentes sobre as actuacións financiadas con fondos MRR e nos prazos que correspondan no aplicativo que para ese efecto establecerá a administración competente.*

*2º) En aplicación do principio de «non causar dano significativo» (principio «do no significant harm-DNSH»), de acordo co previsto no Plan de Recuperación, e polo Regulamento (UE) n.º 2021/241 do Parlamento Europeo e do Consello, do 12 de febreiro de 2021, respectarase a normativa ambiental aplicable, incluído o Regulamento (UE) 2020/852, do Parlamento Europeo e do Consello do 18 de xuño de 2020, relativo ao establecemento dun marco para facilitar os investimentos sostíbeis e polo que se modifica o Regulamento (UE) 2019/2088, así como a Guía Técnica da Comisión Europea (2021/ C 58/01) sobre a aplicación deste principio de «non causar dano significativo». Respectaranse os procedementos de avaliación ambiental, cando sexan de aplicación, conforme á lexislación vixente, así como outras avaliacións de repercusións que puidesen resultar de aplicación en virtude da lexislación ambiental.*

*Deberase achegar xustificación do cumprimento do principio DNSH mediante unha avaliación favorable de adecuación ao principio de DNSH, ou no seu caso, unha declaración responsable do cumprimento do mesmo.*

*En todo caso, seguindo o disposto na Decisión de Execución do Consello, a fin de garantir que as medidas contidas no PSTD se axustan á Guía técnica sobre a aplicación do principio de DNSH, os criterios de subvencionabilidade incluídos no prego de condicións para as próximas convocatorias de proxectos excluírán as actividades que se enumeran a continuación: i) as actividades relacionadas cos combustíbeis fósiles, incluída a utilización ulterior dos mesmos; ii) as actividades no marco do réxime de comercio de dereitos de*





*emisión da UE (RCDE) en relación coas cales se prevexa que as emisións de gases de efecto invernadoiro que van provocar non se situarán por baixo dos parámetros de referencia pertinentes; iii) as actividades relacionadas con entullos de residuos, incineradoras e plantas de tratamento mecánico-biolóxico; e iv) as actividades nas que a eliminación a longo prazo de residuos poida causar danos ao medio ambiente. O prego de condicións esixirá ademais que só poidan seleccionarse aquelas actividades que cumpran a lexislación ambiental nacional e da UE pertinente.*

*3º) Pola restante normativa reguladora do Mecanismo de Recuperación e Resiliencia e, en especial, co disposto na normativa que a Comunidade Autónoma de Galicia e o Goberno de España aprobe a este respecto, así como polas disposicións comunitarias sobre o Mecanismo de Recuperación e Resiliencia.*

*Así mesmo as entidades beneficiarias comprométese a devolver o anticipo reembolsable nos termos pactados na cláusula sétima e deben acreditar, previamente ao pago do anticipo reembolsable, que se encontran ao corrente das súas obrigacións coa Seguridade Social, non tendo débedas en período executivo de pago co Estado, nin de carácter tributario con outras Administracións Públicas así como acreditar que non estás incursas nalgunha das circunstancias reguladas no artigo 13 da Lei Xeral de Subvencións.*

#### **Quinta. Actuacións de rehabilitación, equipamentos e infraestruturas**

*Para as actuacións que signifiquen rehabilitación, equipamentos e infraestruturas deberanse ter en conta as seguintes condicións específicas do principio DNSH, recollidas na cláusula sexta do convenio ARD Ría Muros-Noia coa Axencia Turismo de Galicia:*

- Para prevención e o control da contaminación: realizar unha avaliación de impacto ambiental de cada un dos investimentos da medida de acordo coa Directiva da EIA e a normativa nacional de avaliación de impacto ambiental, e identificaranse e incluírán no deseño de cada proxecto todas as medidas de mitigación necesarias para a prevención e o control da contaminación do chan e da auga.*
- Os compoñentes e materiais de construción utilizados na construción non conterán amianto nin substancias moi preocupantes identificadas sobre a base da lista de substancias suxeitas a autorización que figura no anexo XIV do Regulamento (CE) 1907/2006 do Parlamento Europeo e do Consello.*
- Os compoñentes e materiais de construción utilizados na construción que poidan entrar en contacto cos usuarios emitirán menos de 0,06 mg de formaldehído por m<sup>3</sup> de material ou compoñente e menos de 0,001 mg de compostos orgánicos volátiles canceríxenos de categorías 1A e 1 B por m<sup>3</sup> de material ou compoñente, previa proba de acordo con CEN / TS 16516 e ISO 16000-3 ou outras condicións de proba estandarizadas e métodos de determinación comparables. Ademais, adoptaranse medidas para reducir o ruído, o po e as emisións contaminantes durante a fase de obra e executaranse as actuacións asociadas a esta medida sempre cumprindo a normativa de aplicación vixente en canto a posible contaminación de chans e auga.*
- Para a prevención e o control da contaminación e protección e restauración da biodiversidade e os ecosistemas: Cando as actuacións de rehabilitación teñan lugar en áreas sensibles á biodiversidade (incluída a rede Natura 2000 de áreas protexidas, sitios do Patrimonio Mundial da UNESCO e áreas crave para a biodiversidade, así como outras áreas protexidas) ou en áreas próximas, requirirase o cumprimento dos artigos 6 (3) e 12 da Directiva de hábitats e o artigo 5 da Directiva de aves. Ademais, cando sexa preceptivo, levará a cabo unha Avaliación de Impacto Ambiental (EIA) de acordo coa Directiva EIA.*
- Para mitigación do cambio climático: Na rehabilitación de edificios teranse en consideración as directrices recollidas na Directiva (UE) 2018/844 relativa á eficacia enerxética dos edificios para que sexan edificios de consumo de enerxía case nulo, permitindo reducir de forma significativa o consumo de enerxía primaria non renovable.*
- Para adaptación ao cambio climático: As medidas de rehabilitación permitirán contribuír á adaptación dos edificios ao cambio climático, adoptando as solucións de adaptación que sexan posibles no marco das*



*opcións que permita a edificación existente e a súa protección no caso de que sexan edificios protexidos, como a utilización de cubertas vexetais, toldos, zonas de sombreado, etc.*

• *Para transición a unha economía circular:*

- 1. Polo menos o 70% (en peso) dos residuos de construción e demolición non perigosos (excluído o material natural mencionado na categoría 17 05 04 na Lista europea de residuos establecida pola Decisión 2000/532 / EC) xerados, nas actuacións previstas neste investimento, será preparado para a súa reutilización, reciclaxe e recuperación doutros materiais, incluídas as operacións de recheo utilizando residuos para substituír outros materiais, de acordo coa xerarquía de residuos e o Protocolo de xestión de residuos de construción e demolición da UE.*
- 2. Os operadores limitarán a xeración de residuos nos procesos relacionados coa construción e demolición, de conformidade co Protocolo de xestión de residuos de construción e demolición da UE e tendo en conta as mellores técnicas dispoñibles e utilizando a demolición selectiva para permitir a eliminación e manipulación segura de substancias perigosas e facilitar a reutilización e reciclaxe de alta calidade mediante a eliminación selectiva de materiais, utilizando os sistemas de clasificación dispoñibles para residuos de construción e demolición.*
- 3. Os deseños dos edificios e as técnicas de construción apoiarán a circularidade no referido á norma ISO 20887 para avaliar a capacidade de desmonte ou adaptabilidade dos edificios, como estes están deseñados para ser máis eficientes no uso dos recursos, adaptables, flexibles e desmontables para permitir a reutilización e a reciclaxe.*

**Sexta. Subcontratación**

*Consonte a cláusula oitava do antedito convenio Axencia de Turismo de Galicia-ARD Ría Muros-Noia, as actividades subvencionadas poderán ser obxecto de subcontratación total ou parcial tendo en conta o disposto nesta cláusula e de acordo co establecido no artigo 27 da Lei 9/2007, do 13 de xuño, de subvencións de Galicia, así como na normativa en materia de axudas de Estado e o establecido no Real decreto lei 36/2020, do 30 de decembro e nas Ordes HFP 1030/2021 e HFP 1031/2021, do 29 de setembro. En todo caso quedan fóra da subcontratación aqueles gastos nos que teña que incorrer a entidade para a realización por si mesma da actividade subvencionada.*

*A necesidade da subcontratación estará debidamente motivada pola entidade beneficiaria e, en ningún caso, suporá un aumento do custo da actividade subvencionada.*

*Os subcontratistas quedarán obrigados soamente ante a entidade, que asumirá a total responsabilidade da execución da actividade subvencionada fronte á administración. A asociación será a responsable de que na execución da actividade subvencionada concertada con terceiros se respecten os límites establecidos neste convenio en canto á natureza e contía dos gastos subvencionables e esixiranlles aos subcontratistas os documentos acreditativos dos pagamentos correspondentes.*

*No caso de que se subcontrate parte ou a totalidade da actividade obxecto haberá de prever os mecanismos para asegurar que os subcontratistas cumpran co principio de «non causar un prexuízo significativo ao medio ambiente».*

*As entidades subcontratadas deberán comprometerse a cumprir cos estándares máis esixentes en relación ás normas xurídicas, éticas e morais, adoptando as medidas necesarias para previr e detectar a fraude, a corrupción e os conflitos de intereses, así como a respectar os principios de economía circular e evitar impactos negativos significativos no medio ambiente («DNSH» polas súas siglas en inglés «do no significant harm») na execución das actuacións levadas a cabo no marco do devandito plan, así como a non incorrer en dobre financiamento e que, no seu caso, non lle conste risco de incompatibilidade co réxime de axudas de Estado. Para estes efectos, o cumprimento nestes termos acreditarase mediante declaración da subcontrata correspondente.*



## CONCELLO DE MUROS

Curro da Praza, 1  
15250 A Coruña  
T. +34 981 826 050

*As entidades beneficiarias deberán identificar os contratistas e subcontratistas, de maneira que incluírán nos procedementos de licitación o seguintes extremos:*

- a) *NIF do contratista ou subcontratistas.*
- b) *Nome ou razón social.*
- c) *Domicilio fiscal do contratista e, no seu caso, subcontratistas.*
- d) *Aceptación da cesión de datos entre as Administracións Públicas implicadas para dar cumprimento ao previsto na normativa europea que é de aplicación e de conformidade coa Lei Orgánica 3/2018, do 5 de decembro, de protección de datos persoais e garantía dos dereitos dixitais.*
- e) *Declaración responsable relativa ao compromiso de cumprimento dos principios transversais establecidos no PRTR e que poidesen afectar ao ámbito obxecto de xestión.*
- f) *Os contratistas acreditarán a inscrición no Censo de empresarios, profesionais e retedores da Axencia Estatal da Administración Tributaria ou no Censo equivalente da Administración Tributaria Foral, que debe reflectir a actividade efectivamente desenvolvida na data de participación no procedemento de licitación.*

### **Sétima. Prazo e forma de xustificación**

*De conformidade coa cláusula décima do convenio Axencia de Turismo de Galicia-ARD Ría Muros-Noia, as actuacións subvencionadas deberán estar rematadas antes do 31 de decembro 2024 e a súa xustificación presentada ante a Axencia Turismo de Galicia como data límite o 30 de xuño de 2025 (sen prexuízo das ampliacións de prazos que se poidan obter de conformidade coa normativa reguladora do PSTD) cunha memoria de actuación xustificativa do cumprimento das condicións impostas e unha memoria económica, tendo en conta as singularidades establecidas no artigo 63 do Real decreto-lei 36/2020, do 30 de decembro, que conterá a seguinte documentación:*

- a) *Unha memoria de actuación xustificativa do cumprimento das condicións con indicación das actividades realizadas e dos resultados obtidos.*
- b) *Unha relación clasificada dos gastos da actividade, con identificación do acredor e do documento, o seu importe, data de emisión e, no seu caso, data de pago. No caso de que a axuda se outorgue conforme a un orzamento, indícaranse as desviacións acaecidas.*
- c) *As facturas ou documentos de valor probatorio equivalente no tráfico xurídico mercantil ou con eficacia administrativa incorporados na relación á que se fai referencia no parágrafo anterior e, no seu caso, a documentación acreditativa do pago.*
- d) *Os tres presupostos que, en aplicación do artigo 31.3 da Lei 38/2003, do 17 de novembro, xeral de subvencións, deba solicitar o beneficiario.*
- e) *Certificado expedido pola Intervención, acreditativo da aplicación á súa finalidade dos fondos percibidos e o detalle dos pagos efectuados correspondentes ás actuacións subvencionadas obxecto da subvención.*
- f) *Certificado emitido pola entidade que acredite a realización da actividade e o cumprimento da finalidade, así como do informe emitido pola Intervención.*
- g) *Documento acreditativo sobre as medidas de difusión adoptadas para xeral coñecemento do financiamento polo Estado no marco do Plan de Recuperación, Transformación e Resiliencia das actuacións obxecto da subvención.*



*h) Documentos de declaracións responsables, atendendo ás disposicións normativas sobre o sistema de xestión e de información establecidas na Orde HFP/1030/2021, do 29 de setembro, e a Orde HFP/1031/2021, do 29 de setembro.*

*Tamén deberán conservar toda a documentación orixinal, xustificativa e de aplicación dos fondos recibidos, en tanto poidan ser obxecto das actividades de comprobación e control.*

*Así mesmo, as entidades executora e colaboradoras deberán presentar calquera outros informes ou documentos xustificativos que de acordo coa normativa europea ou nacional resulten esixibles no marco do Plan de Recuperación, Transformación e Resiliencia.*

*A Axencia de Turismo de Galicia comprobará a documentación achegada e poderá solicitar a achega adicional doutros documentos ou datos aclaratorios que estime necesarios ou no seu caso, se fose preciso, do correspondente procedemento de reintegro dos importes non utilizados.*

*Coa finalidade de cumprir co previsto no Fito 220 recollido na Decisión de Execución do Consello, as Comisións de Seguimento aseguraranse de que todos os destinos beneficiarios logren como mínimo as seguintes porcentaxes de execución de cada Plan de Sustentabilidade Turística.*

*- Execución do 75 % no caso dos destinos adxudicados en 2021.*

*- Execución do 50 % no caso dos destinos adxudicados en 2022.*

*- Execución do 25 % no caso dos destinos adxudicados en 2023.*

*Por outra banda, en virtude do disposto no Fito 221, a finalización de todos os proxectos incluídos nos PSTD e adxudicados en consonancia cos obxectivos 217, 218 e 219, o 35% de cuxos fondos se destinarán a financiar medidas que aborden a transición verde, a sustentabilidade e a eficiencia enerxética / electromobidade nos destinos, de conformidade coa Guía técnica sobre a aplicación de principio de DNSH, mediante o uso dunha lista de exclusións e o requisito de cumprimento da lexislación ambiental pertinente da UE e nacional.*

*Producirase a devolución anticipada do anticipo reembolsable xunto cos intereses de demora, nos seguintes casos:*

- Se se cancelase total ou parcialmente o proxecto por causas imputables aos beneficiarios ou aos contratistas/subcontratistas.*
- Se se producise a resolución do presente convenio.*
- Cando non se presente a documentación xustificativa nos prazos indicados, ou esta non fose correcta.*

#### **Oitava. Publicidade e difusión**

*De conformidade co disposto na cláusula décimo-primeira do convenio Axencia Turismo de Galicia-ARD Ría Muros-Noia, as entidades beneficiarias das axudas deberán cumprir as seguintes obrigacións en materia de publicidade e difusión:*

*a) As relativas ao financiamento do Mecanismo de Recuperación e Resiliencia, conforme coa normativa europea e nacional que resulte aplicable segundo ao artigo 34.2 do Regulamento (UE) 2021/241 polo que se regula o MRR e, especificamente, coas do artigo 9 da Orde HFP/1030/2021, do 29 de setembro.*

*b) Nas medidas de información e comunicación das actuacións que desenvolven os investimentos (carteis informativos, placas, publicacións impresas e electrónicas, material audiovisual, páxinas web, anuncios e insercións en prensa, certificados, etc.), deberánse incluír os seguintes logos:*



## CONCELLO DE MUROS

Curro da Praza, 1  
15250 A Coruña  
T. +34 981 826 050

1.º O emblema da Unión Europea.

2.º Xunto co emblema da Unión, incluírase o texto «Financiado pola Unión Europea - Next Generation EU».

3.º Teranse en conta as normas gráficas e as cores normalizadas establecidas no anexo II do Regulamento de Execución 821/2014, polo que se establecen disposicións de aplicación do Regulamento (UE)n.º 1303/2013 do Parlamento Europeo e do Consello no que se refire ás modalidades concretas de transferencia e xestión das contribucións do programa, a presentación de información sobre os instrumentos financeiros, as características técnicas das medidas de información e comunicación das operacións, e o sistema para o rexistro e o almacenamento de datos. Tamén se pode consultar a seguinte páxina web: <http://publications.europa.eu/code/es/es-5000100.htm> e descargar distintos exemplos do emblema en: [https://europa.eu/european-union/about-eu/symbols/flag\\_es#download\\_](https://europa.eu/european-union/about-eu/symbols/flag_es#download_)

c) Toda referencia en calquera medio de difusión sobre os investimentos aprobados deberá incluír que foron financiadas polo Ministerio de Industria, Comercio e Turismo e a Axencia Turismo de Galicia.

d) Toda referencia en calquera medio de difusión sobre os investimentos aprobados deberá usar como medio de difusión o logo do Plan de Recuperación, dispoñible no link <http://planderecuperacion.gob.es/identidad-visual>.

2. No seu caso, todos os carteis informativos e placas deberán colocarse nun lugar ben visible e de acceso ao público, e o texto deberá estar redactado nos idiomas oficiais da Comunidade Autónoma de Galicia.

### **Novena. Incumprimento e reintegro**

1. A constatación de que as entidades beneficiarias non utilizaron a subvención da Axencia Turismo de Galicia para o destino específico para o que se solicitou e concedeu, non realicen a actuación que deu orixe á subvención, non xustifiquen a súa aplicación aos fins determinados para os que se interesou ou, en xeral, da existencia de calquera suposto de incumprimento das condicións que motivaron a concesión da subvención, a negativa para facilitar o labor de inspección e o non cumprimento das obrigacións atribuídas ás persoas beneficiarias, dará lugar previa audiencia ao interesado, á declaración de perda do dereito á percepción da subvención e, no seu caso, á obrigación de reintegrar á Tesoureira Xeral autonómica as cantidades percibidas, máis os intereses legais que procedan, de conformidade e nos termos establecidos no artigo 33 da Lei 9/2007, do 13 de xuño, de subvencións de Galicia, e concordantes do Regulamento da Lei de subvencións de Galicia.

No caso de que se produza exceso das subvencións percibidas de distintas entidades públicas, as entidades deberán reintegrar o exceso xunto cos xuros de demora, nos termos que establece o artigo 23 do citado Regulamento. No caso de que proceda a devolución anticipada do anticipo reembolsable estarase ao establecido na cláusula décima.

De igual modo, de conformidade co Acordo da Conferencia Sectorial de Turismo, celebrada o día 21 de decembro de 2021, na que se aproban os criterios de repartición e distribución territorial de créditos destinados ao financiamento de actuacións de investimento por parte de entidades locais no marco do Compoñente 14 Investimento 1 do Plan de Recuperación, Transformación e Resiliencia, conlevará a devolución total ou parcial das cantidades percibidas:

a) Non lograr, en todo ou en parte, os obxectivos previstos: reintegro polo menos cando o incumprimento impida o retorno de fondos europeos ao Tesouro e no importe do retorno non percibido en relación coas medidas da responsabilidade da Comunidade Autónoma.

b) Non poder acreditarse o logro dos obxectivos por falta de fiabilidade dos indicadores reportados: reintegro polo menos cando o incumprimento impida o retorno de fondos europeos ao Tesouro e no importe do retorno non percibido en relación coas medidas da responsabilidade da Comunidade Autónoma.



c) *Calquera irregularidade que afecte a medidas baixo a súa responsabilidade determinada en calquera control desenvolvido por autoridades nacionais ou comunitarias que recaia sobre aquelas e que impida o retorno de fondos ao Tesouro: reintegro do importe do retorno non percibido en relación coas medidas da responsabilidade da Comunidade Autónoma.*

d) *Non utilización das cantidades recibidas para as medidas para as que se transferiron: reintegro de fondos ao Estado polo importe indebidamente utilizado.*

2. *Así mesmo, procede o reintegro de fondos polas súas especiais condicións en caso de incumprimento do principio de «non causar prexuízo significativo», da etiquetaxe dixital ou ambiental ou das condicións recollidas na Decisión de Execución do Consello relativa á aprobación da avaliación do plan de recuperación e resiliencia de España e no Compoñente 14.*

3. *Cando o cumprimento polas entidades beneficiarias se aproxime de modo significativo ao cumprimento total, entendo por tal a adecuada satisfacción do obxectivo perseguido coa concesión da axuda, e se acredite pola entidade beneficiaria unha actuación inequivocamente tendente á satisfacción dos seus compromisos por atoparse en fase final de execución as actuacións obxecto da subvención, a cantidade para reintegrar virá determinada pola aplicación dos criterios enunciados na letra n) do apartado 3 do artigo 17 da Lei 38/2003, do 17 de novembro.*

4. *O órgano competente para esixir o reintegro da subvención concedida será a persoa titular da Axencia Turismo de Galicia.*

#### **Décima. Compatibilidade con outras axudas ou subvencións e ausencia de dobre financiamento**

*Conforme ao establecido no artigo 9 do Regulamento (UE) 2021/241 do Parlamento Europeo e do Consello, do 12 de febreiro de 2021, a axuda concedida no marco do Mecanismo sumarase á proporcionada conforme outros programas e instrumentos da Unión. As reformas e os proxectos de investimento poderán recibir axuda doutros programas e instrumentos da Unión sempre que dita axuda non cubra o mesmo custo.*

*Terase así mesmo en conta o previsto no apartado 3 do artigo 7 da Orde HFP/1030/2021, do 29 de setembro.*

*En consecuencia, as axudas deben respectar o principio de adicionalidade e a necesidade de establecer mecanismos que eviten o dobre financiamento, de maneira que os investimentos financiados con fondos do MRR poderán recibir axudas doutros programas e instrumentos da Unión, sempre que dita axuda non cubra o mesmo custo, e en todo caso de conformidade co disposto no Regulamento (UE, Euratom) 2018/1046, do Parlamento Europeo e do Consello, do 18 de xullo de 2018, sobre as normas financeiras aplicables ao Orzamento Xeral da Unión (Regulamento Financeiro).*

#### **Décimo primeira. Protección de datos**

*As partes asinantes están obrigadas, en materia de protección de datos, a cumprir co Regulamento (EU) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (regulamento xeral de protección de datos) e coa Lei Orgánica 3/2018, do 5 de decembro, de protección de datos persoais e garantías de dereitos dixitais.*

*As citadas obrigacións subsistirán aínda despois de terminado o proxecto de referencia.*

*No presente convenio, será responsable do tratamento a ARD Ría Muros-Noia nos termos establecidos na normativa referenciada e coas obrigacións e condicionamentos que aquela establece.*

#### **Décimo segunda. Normas específicas do procedemento de colaboración e coordinación dos concellos e da ARD Ría Muros-Noia para a execución das actuacións**



## CONCELLO DE MUROS

Curro da Praza, 1  
15250 A Coruña  
T. +34 981 826 050

1. *A colaboración e coordinación dos concellos integrantes e da ARD Ría Muros-Noia para a execución do Subproxecto e a designación do Concello de Noia como entidade executora concrétese do seguinte xeito:*

### *A) Actos preparatorios de contratación*

*-1º. A aprobación dos proxectos de obras, a obtención das autorizacións sectoriais necesarias e a posta a disposición dos terreos precisos para a súa execución, correspóndelles a cada un dos concellos en cuxo territorio se localicen as actuacións. Os demais concellos remitiranlle ao de Noia a documentación citada para que este continúe a tramitación dos expedientes oportunos.*

*Cando se trate dun proxecto de obras que comprenda actuacións en varios municipios, a elaboración do proxecto correspóndelle ao Concello de Noia e a súa aprobación a todos os concellos afectados. A obtención das autorizacións sectoriais e a dispoñibilidade dos terreos corresponde a cada un dos concellos no tocante á parte do proxecto que afecte ao seu territorio.*

*- 2º. A aprobación dos pregos de cláusulas administrativas dos contratos de obras correspóndelle ao Concello de Noia como entidade executora do subproxecto.*

*- 3º. A aprobación dos pregos de cláusulas administrativas e técnicas dos demais contratos diferentes dos de obra pública correspóndelle ao Concello de Noia como entidade executora do Subproxecto.*

*B) A licitación, adxudicación e formalización dos contratos, o exercicio das potestades de control e sancionadora durante a súa execución, a aprobación de certificacións e a realización dos pagos correspóndenlle ao Concello de Noia como entidade executora do subproxecto, así como o nomeamento de directores técnicos das obras e de responsables dos contratos, e o exercicio das potestades de control durante os períodos de garantía.*

*C) Tamén lle corresponde ao Concello de Noia, na calidade de única entidade executora-colaboradora, a recepción das prestacións dos contratos de obras e servizos que licite na antedita condición, e a posterior transferencia das obras e servizos á ARD Muros-Noia para que esta, como perceptora dos Fondos, os entregue aos concellos beneficiarios.*

2. *A ARD Ría Muros-Noia, como entidade beneficiaria e perceptora dos Fondos, resérvase as potestades de coordinación e control das actuacións de execución dos proxectos por medio de:*

*a) A prestación de conformidade previa aos proxectos de obras, e aos pregos de cláusulas administrativas e técnicas das licitacións de obras e servizos, sen prexuízo da súa posterior aprobación polos concellos aos que lles corresponde.*

*b) A participación dun representante da ARD nos actos de recepción da obra ou servizo contratados.*

3. *Calquera modificación dos proxectos de obras ou das características dos servizos obxecto de contratación deberá contar coa aprobación previa da ARD Ría-Muros Noia e, no caso de que sexa preceptivo, coa aprobación da Comisión de Seguimento do PSTD.*

4. *As obras públicas incluídas no Plan e subproxecto obxecto deste convenio terán a consideración de propias dos concellos integrantes da ARD Ría Muros-Noia para os efectos de innecesiedade de obter licenza urbanística da Corporación en cuxo territorio ou territorios se executen e de non suxeición ás taxas aplicables nin ao imposto de construcións, obras e instalacións.*

5. *O destino dos remanentes que se poidan xerar nos procesos de licitación e execución das actuacións deberá ser aprobado pola ARD Ría Muros-Noia e, no caso de que sexa preceptivo, pola Comisión de Seguimento do PSTD, sempre con suxeición ás normas reguladoras da subvención concedida ao abeiro do PRSR e no marco do PSTD, tendo en conta especialmente as porcentaxes obrigatorias dos eixos e etiquetas climáticas definidos nos regulamento e convocatoria dos PSTD.*



6. A ARD Ría Muros-Noia transferiralle os fondos da subvención ao Concello de Noia trala sinatura deste convenio que abrirá para o efecto unha conta restrinxida ás operacións de execución do PSTD.

7. O Concello de Noia elaborará a documentación xustificativa da execución das actuacións do subproxecto na forma e prazo previstos na cláusula sétima deste convenio, coa colaboración que sexa precisa dos demais concellos beneficiarios e da ARD Muros-Noia.

8. A ARD Ría Muros-Noia e os concellos beneficiarios actuarán na execución deste convenio con suxeición aos principios de boa fe, confianza lexitima e lealdade institucional, cooperación e coordinación, comprometéndose a manter informados puntualmente cada un deles aos demais sobre calquera incidencia que poida ser relevante para os efectos da execución do convenio.

9. Con anterioridade a este convenio ou con carácter simultáneo á súa aprobación, a ARD Ría Muros-Noia e os concellos colaboradores aprobarán e implantarán un Plan Antifraude e constituirán os órganos e mecanismos previstos nel (comité antifraude, caixa de correo de denuncias, etc.). As disposicións do antedito Plan serán aplicables á cadea de trámites necesarios para xestionar os fondos e executar os proxectos.

#### **Décimo terceira. Comisión de seguimento do presente Convenio**

A Xunta Directiva da ARD Ría Muros-Noia, na que están representados todos os seus concellos integrantes, desempeñará as funcións de comisión de seguimento deste convenio e corresponderanlle as funcións de control das actuacións e resolución das cuestións que poidan xurdir verbo da súa interpretación e execución. O funcionamento da antedita Xunta axustarase ás normas reguladoras dos estatutos da ARD Muros-Noia.

*En proba de conformidade e trala súa lectura, os comparecentes asinan este convenio no lugar e data sinalados no encabezamento.”*

A señora alcaldesa dá paso ás primeiras intervencións.

A Sra. González di que se lle esqueceu dicir á señora alcaldesa que esta proposta vén ditaminada favorablemente só polos votos do equipo de goberno e que vén financiada polos fondos Next Generation da Unión Europea, e di que lles parece ben que se fagan obras xa que son todas necesarias. Sinala que con respecto á obra non están de acordo con que non estea consensuada, e que sería necesario facer esta actuación noutras praias, e non na do Acoradoiro. Di que propoñían que se fixeran as baixadas no resto das praias. E indica que unha débeda que ten a alcaldesa é a recuperación do conxunto histórico de Muros, e que deberían recuperar a Bandeira Azul.

A Sra. Lago di que entenden que O Acoradoiro precisa unha adecuación mais piden que respecten a conservación do entorno e que realicen unha accesibilidade real para os usuarios e usuarias.

A Sra. Alfonso sinala que botou en falta que se contactara con eles, di que fala por ela xa que non son grupo, antes de redactar o proxecto, si ten claro que é unha zona con moito tránsito, e ten clarísimo que necesita arranxo, e di que é indubidable que hai que arranxar o acceso do resto de praias e que o conxunto histórico necesita melloras, pero todos e todas saben que cando hai fondos non se poden dedicar a todas as partes, e solicita que a intervención sexa moi respectuosa co medio xa que é un espazo moi bonito e vulnerable, e sinala que lle consta que colaboraron no proxecto entidades que van velar pola accesibilidade e que a intervención sexa respectuosa co espazo.

A Sra. Sambade di que na mesma liña ca a Sra. Alfonso e que ter acceso a estas axudas é positivo, xa que son cartos que veñen para Muros e son ben recibidos, e como están afeitos a que lle presenten os proxectos sen consultar que vese na obriga de estar de acordo.

O Sr. Quintela di que lle parece moi axeitada a actuación nesa zona, xa que con ir no verán pódese ver o que pasa cos vehículos, e reordenar a súa circulación e a de persoas parécelle moi adecuado.





## CONCELLO DE MUROS

Curro da Praza, 1  
15250 A Coruña  
T. +34 981 826 050

A señora alcaldesa di que a Sra. González non debe de escoitar nada da súa intervención no que di varias veces que son fondos Next Generation, e si hai obras da Deputación posto que é unha obriga desta, e di que os carteis da Xunta de Galicia non os ve, pero si se investiu no colexio Ramón de Artaza e no instituto do Fontexería, e neste momento hai un investimento importante na zona de portos. Sinala que a actuación no Ancoradoiro é un plan que encaixa perfectamente neste programa e que a voceira do PSOE sempre lles marcou que non conseguían fondos europeos, e conseguíronos, e fixeron todo o posible para conseguilo. Indica que este convenio vai facer que estes fondos se executen e renunciar a este suporía renunciar a unha inversión moi importante para acondicionar unha das praias máis importante de Louro, renunciar á adecuación e sinalización de parte do camiño de Santiago e renunciar a dixitalización do destino Muros-Noia... E di que en canto ao indicado pola Sra. Lago, hai unha declaración de impacto ambiental en todas as actuacións que se van a facer.

A señora alcaldesa remata dicindo que esta actuación é unha boa nova para o concello de Muros e dá paso ás segundas intervencións.

A Sra. González reitera que son partidarios de conseguir a Bandeira Azul e de que se fagan intervencións en todas as praias, e indica que non é certo que a señora alcaldesa teña interese no conxunto histórico e espera que o novo goberno si o faga.

A Sra. Alfonso di que lamenta que non os chamara para acordar algo xa que ela non vai seguir, pero que si que ten claro que actuaría en beneficio da veciñanza e insiste que lle parece ben a actuación, inda que lle deran xa todo feito.

Rematadas as intervencións o Pleno da corporación, cos votos a favor do grupo municipal popular (4), do grupo municipal do BNG (2) e dos concelleiros non adscritos (3) e coa abstención do grupo municipal socialista (4), adopta por unanimidade o seguinte acordo:

**PRIMEIRO.** A aprobación do Convenio de Colaboración entre o Concello de Muros e a Asociación Rural de Desenvolvemento da Ría de Muros-Noia para executar o PSTD “Novos Modelos para a sostibilidade e competitividade Turística na Ría Muros- Noia”, no marco do plan de Recuperación, Transformación e Resiliencia financiado pola Unión Europea Next Generation EU.

**SEGUNDO.** Facultar á señora alcaldesa do Concello de Muros para a formalización e sinatura do referido convenio e para todas aquelas actuacións que sexan necesarias para a mellor execución do acordado.

### **Terceiro. Moción do grupo municipal popular do concello de Muros en relación aos plans de ordenación do espazo marítimo (POEM)**

Intervén a alcaldesa que explica a proposta que vén ditaminada favorablemente pola comisión informativa:

*“O Grupo Municipal Popular de Muros conforme ao previsto no Regulamento de Organización, Funcionamento e Réxime Xurídico das Entidades Locais, eleva ao Pleno a seguinte moción*

#### **EXPOSICIÓN DE MOTIVOS**

*O pasado 4 de marzo publicouse no Boletín Oficial do Estado o Real Decreto 150/2023, de 28 de febreiro, polo que se aproban os Plans de Ordenación do Espazo Marítimo (POEM) das cinco demarcacións mariñas españolas: noratlántica no que se inclúen as augas mariñas que bañan o litoral de Galicia - sudatlántica, do Estreito e Alborán, levantino-balear e canarias.*

*Lamentablemente, este acordo volve a evidenciar o escaso interese do actual Goberno de España por chegar a acordos coas Comunidades Autónomas e co tecido produtivo, xa que a planificación aprobada en ningún caso se levou a cabo desde un consenso real coa Xunta de Galicia e dos sectores implicados, é dicir, nin co sector marítimo- pesqueiro, nin tampouco coa industria da eólica mariña.*



## CONCELLO DE MUROS

Curro da Praza, 1  
15250 A Coruña  
T. +34 981 826 050

*En consecuencia, o texto aprobado non recolle todas as sensibilidades necesarias para garantir un desenvolvemento da eólica mariña como vector de competitividade e de impulso industrial, sempre e cando existan as máximas garantías de compatibilidade coa actividade pesqueira. Cómpre recordar que a industria galega xa emprega a 1.200 persoas en proxectos de eólica mariña, un segmento de actividade no que somos un referente a nivel mundial e europeo, e que, ademais, ten a aspiración de contar con 8.000 traballadores e traballadoras nos vindeiros anos.*

*Polo tanto, antes de falar de proxectos concretos, a vicepresidenta terceira e ministra para a Transición Ecolóxica e o Reto Demográfico do Goberno, Teresa Ribera, debe cumprir o compromiso adquirido co presidente a Xunta e reunirse co Observatorio da Eólica Mariña de Galicia. Constituído en xuño de 2021, o seu obxectivo é servir de foro de diálogo, encontro e análise para a procura da coexistencia e compatibilidade do potencial desenvolvemento da eólica mariña na Comunidade con todas as actividades existentes, con especial atención ás actividades marítimo-pesqueiras.*

*Deste xeito, o Goberno debe rectificar a súa posición e buscar puntos de encontro, sempre baixo a premisa de garantir a compatibilidade entre as actividades tradicionais e o desenvolvemento da eólica mariña, así como atender as solicitudes feitas desde Galicia:*

- Incorporar información máis detallada dos caladoiros existentes e non unha delimitación xeral.*
- Explicar por que a vixencia do POEM é ata 2027 cando todo apunta a que os proxectos de eólica mariña serán executados en datas posteriores.*
- Aclarar cando ten previsto establecer un marco normativo adecuado e a convocatoria das poxas de lámina de auga para que realmente os promotores poidan presentar os seus proxectos.*
- Adoptar un modelo de evacuación da enerxía centralizado, no que se obrigue aos promotores a compartir estas infraestruturas e vaian ao mesmo punto de conexión, evitando afeccións sobre o territorio.*

*Por todo o exposto o Grupo Municipal Popular de Muros insta a acordar por parte do Pleno municipal a:*

*“O concello de Muros demanda ao Goberno de España:*

- 1. Que xustifique tecnicamente as zonas de alto potencial para o desenvolvemento da eólica mariña incluídas finalmente nos POEM.*
- 2. Que explique por que non se consideraron todos os datos asociados á pesca e aos caladoiros.*
- 3. Que dea resposta ás opinións do sector marítimo pesqueiro e se reúna cos axentes implicados no eido do Observatorio da Eólica Mariña.”*

A señora alcaldesa di que traen esta proposta por solicitude do sector pesqueiro que está preocupado pola publicación do Real Decreto 150/2023, de 28 de febreiro.

A Sra. González indica que esta moción non ten nin pés nin cabeza xa que é un problema do Ministerio de Facenda e con respecto á eólica mariña di que vai ler a nota de prensa da ministra Teresa Ribera na que sinala que o Real Decreto lles dá obriga de establecer estes POEM e o debate da eólica mariña está aberto en Europa, en España e en Galicia, estes POEM non son primeiros plans de ordenación do espazo marítimo, establecen zonas potenciais para a instalacións da eólica mariña e identifícanse as zonas aptas para a eólica mariña e as regras de convivencia cos sectores tradicionais na costa de Galicia. Estes POEM non implican a autorización automática destes parques marítimos, senón que previamente deberán realizar unha avaliación do impacto sobre os recursos pesqueiros da zona que puideran verse afectados e cada proxecto de parque eólico deberá de ser estudado de xeito individual incluíndo as afeccións a outros sectores económicos, coma o pesqueiro ou acuícola, e o seu funcionamento sería como os PXOM nos concellos, e este marco dota de garantías ao sector pesqueiro. E sinala que aínda queda un longo camiño na súa regulación e que consideran moi importante a participación do sector pesqueiro na súa regulación.



## CONCELLO DE MUROS

Curro da Praza, 1  
15250 A Coruña  
T. +34 981 826 050

A Sra. Lago di que traen unha emenda na que propoñen modificar os acordos que propón a moción do PP:

*“Demandar ao goberno español:*

*PRIMEIRO. Retirada inmediata dos POEM como demanda unánime o sector pesqueiro galego.*

*SEGUNDO. Declaración da costa galega como libre de instalacións de eólica mariña para garantir a preservación dos ecosistemas mariños e a viabilidade futura do sector pesqueiro galego.”*

A Sra. Lago di que se teñen que poñer de acordo co sector pesqueiro para a elaboración dos POEM, e con respecto ao segundo punto, a declaración da costa galega como zona libre de instalacións eólicas dicía que na costa galega non era viable a instalación de eólicos para a flota galega e esta foi aprobada polo parlamento galego no 2009 por unanimidade, mais no 2021 cambiou, porque o PP e máis o PSOE cambiaron a súa posición no parlamento, abrindo a porta a súa instalación.

A señora alcaldesa di que as emendas hainas que presentar antes de que se inicie o debate do asunto mais aínda así non teñen problema en falar sobre ela.

A Sra. Martínez auséntase durante dous minutos da sesión plenaria.

A señora alcaldesa di que eles asumen a proposta como lla trasladou o sector pesqueiro, polo que non aceptan a emenda.

A Sra. Lago di que a elas lles trasladou a retirada do POEM e entende que non acepten a emenda, e sinala que o BNG considera que a costa marítima é para o sector pesqueiro e non para a eólica, e que está moi ben o que dixo a portavoz do PSOE, que cada parque marítimo debe estar autorizado individualmente, pero iso tamén sucedeu cos parques eólicos terrestres e o monte está cheo. Todos autorizados de maneira individual. Di que o único problema que ten neste momento o PP coa eólica é que non están eles no goberno e se algo teñen en común o PP e o PSOE é que teñen aos ex presidentes nas compañías eléctricas. Son partidarias de pechar a porta á eólica mariña, xa que Galicia neste momento produce máis do que consume, pero parece ser que queren que sexamos unha colonia eléctrica e inda por encima en Galicia a electricidade é moita máis cara ca noutra zona, e con elas non vai esta moción.

A Sra. Sambade sinal que governe quen governe, a Galicia sempre lle toca perder con estes temas, polo que non está de acordo.

A señora alcaldesa di que lle parece ben que a Sra. González se faga fotos coa ministra e tamén que se traslade a problemática da veciñanza de Esteiro, e se a ministra ten interese en falar co sector só ten que sentarse no observatorio da eólica e falar. E indica que o relato é un pouco caótico porque o que vén a dicir é que os plans de ordenación do espazo marítimo non son plans de ordenación, e que a moción lla transmitiu o sector pesqueiro e non lles parece unha moción política senón do sector pesqueiro, e dá paso ás segunda intervencións.

A Sra. González di que esta é unha proposta do sector pesqueiro, e cre máis que a proposta do sector pesqueiro é a presentada polo BNG ca a presentada polo PP, e que inda están a espera de ver a defensa do PP do sector pesqueiro coma co tema da mina de San Finx, posto que presentaron todos os concellos recurso menos o de Muros. E di que non é un relato, que son as manifestacións da ministra, polo que eles van a defender o que dixo a súa ministra.

A Sra. Lago di que isto é política municipal, presentar esta moción pode dicir que non é partidista, e que defender o sector pesqueiro é política.

A Sra. Alfonso di que é curioso que digan que unha moción non é política e sinala que concorda coa voceira do BNG, e que tamén é curioso que o PP pida algo que nunca faría coas súas maiorías absolutas e que é porque goberna o PSOE en Madrid, que só se mira o interese partidario. Indica que é difícil de entender que



## CONCELLO DE MUROS

Curro da Praza, 1  
15250 A Coruña  
T. +34 981 826 050

sendo Galicia unha das produtoras máis importantes de enerxía eléctrica o siga sendo, parece ser que só hai vento en Galicia. E remata dicindo que lle dá moita pena non poder votar a emenda do BNG.

A señora alcaldesa di que na vida todo é política, pero neste caso non o é.

Rematadas as intervencións o Pleno da corporación, cos votos a favor do grupo municipal popular (4), e cos votos en contra do grupo municipal socialista (4), do grupo municipal do BNG (2) e da concelleira non adscrita, Da. Sambade Lloréns (1) e coas abstencións do concelleiro non adscrito, D. Quintela Fernández e da concelleira, Da. Alfonso Torres (2), queda rexeitada a moción.

### **B. Mocións de urxencia**

Non se presentan.

### **C. Parte de control dos órganos de goberno e fiscalización da xestión dos órganos municipais de Goberno**

**Cuarto. Dar conta das resolucións da Alcaldía núm. 71/2023 do 1 de febreiro de 2023 ata o núm. 176/2023 do 28 de febreiro de 2023, e das XGL núm. 3 de 10 de febreiro de 2023 e da núm. 4 do 17 de febreiro de 2023 e das resolucións contrarias aos reparos formulados pola Intervención municipal**

#### **Quinto. Rogos e preguntas**

A señora alcaldesa di que a Sra. González preguntou por un reparo no pleno pasado e que é o embargo dun salario.

#### **Rogos e preguntas formuladas nesta sesión polo grupo municipal PSOE:**

A Sra. González sinala que non teñen preguntas.

#### **Rogos e preguntas formuladas nesta sesión polo grupo municipal BNG:**

A Sra. Lago pregunta polo terreo ao lado da escola de Tal, e a señora alcaldesa di que houbo cambios no Arcebispado e que cre que son favorables para a concesión.

A Sra. Lago pregunta se hai contestación sobre o paso de peóns no Alto do Caño na Abelleira, e a señora alcaldesa di que non a houbo, pero que sinalizaron a parada de transporte escolar.

A Sra. Lago pregunta de novo polo paso de peóns, e a señora alcaldesa di que polo momento non teñen contestación.

A Sra. Lago pregunta polos bancos das marquesiñas que se arranxaron, se se van poñer, e a señora alcaldesa sinala que algunhas que se cambiaron non tiñan banco.

A Sra. Lago pregunta de novo se as que o tiñan se van a repoñer, e a señora alcaldesa di que si.

A Sra. Lago pregunta se se presentou recurso de alzada sobre a reapertura da mina de San Finx, e a señora alcaldesa responde que si, e a Sra. Lago pide que se lle envíe unha copia.

A Sra. Lago pregunta a canto ascenden os proxectos do POS 2023 realizados polo mesmo enxeñeiro, a señora alcaldesa sinala que o ten que consultar.

#### **Rogos e preguntas formuladas nesta sesión pola Sra. Alfonso:**



## CONCELLO DE MUROS

Curro da Praza, 1  
15250 A Coruña  
T. +34 981 826 050

A Sra. Alfonso di que só ten unha pregunta, sobre que se sabe da RPT, ao que a señora alcaldesa contesta que na última mesa de negociación se presentou unha proposta organizativa para que a estuden as e os representantes.

E sen máis asuntos que tratar, a Sra. alcaldesa dá por rematada a sesión, cando son as vinte e unha horas e trinta e cinco minutos, e de todo o que eu como secretaria dou fe.

A secretaria

Documento asinado electronicamente.